

Kalata gwa bubili ugwa Johani Isyakulongosya

Untumigwa Johani aasimbile kalata ujũ umpimba kũ kipanga kya Kyala. Ikipanga iki ikukikoolela ingamu ijaa nkiikulu umwimikigwa. Mwa kalata ujũ ikubalagila abiiitiki ukulutiila ululagilo lwa Jesu ulu lukuti bagananenge. Kangi ikubasoka ukuti basimanyege imanyisyo isya butungulu, ni manyisyo isya bwanalooli isya Jesu Kilisiti. Ndi syosa isi bikupilika babukongeye ubwanalooli.

Uluponio

¹ Une ne nkuulu gwa kipanga kya Kyala, ngukusimbila gwe nkiikulu gwe nsunguligwa pamopeene na baanaako.* Mbaganile nalooli, ngaja niimwene ne mbaganile, looli boope abangi boosa aba bikwitika ubwanalooli boope babaganile.

² Tubaganile paapo uswe tubumeenye ubwanalooli, ubwanalooli ubu bũli nkati mu ndumbula syitu na ubu aabukwendelelaga ukaja na nuuswe bwila na bwila.

Ubwanalooli nu lugano

* **1:1 1:1** Gwe nkiikulu gwe nsunguligwa pamopeene na baanaako Johani ikumponia unkiikulu jumo unsunguligwa, looli ukujoba ukuti unkiikulu unsunguligwa njila ijingi ijaa kujoba ukuti abandũ abaa nkipanga kya Kyala.

³ Taata Kyala nū Mwanaake Jesu Kilisiti, bik-wisa kutubombela kwi ipyana, ku kibabiilisi na ku lutengaano. Ifyo aafikujamo nkati mu ndumbula syitū, uswe twe tukubwitika ubwanalooli na twe tuganeene.

⁴ Naahobwike fijo paapo naapiliike ukuti abaanaako bamo bali mbwanalooli bo muno Taata Kyala aatulagiliile.

⁵ Po leelo bakundwe, ngubapyelesya ukuti tugananege. Ndikubasimbila ululagilo ulupya, looli lo lulalula ula twapeeliigwe bo tukwanda ukwitika.

⁶ Linga tukuganana, tukunangisya ukuntiila Kyala mbuumi bwitū, paapo ukufuma kubwandilo bo tukwanda ukwitika, aatulagiile ukuti tugananege.

Ukujja maaso na basyobi

⁷ Ngujoba isi paapo baboniike abasyobi pakiisū, aba batikwitika ukuti Jesu Kilisiti aaliisile aali nū mbili bo ugu bali nago abandū. Abandū aba bikujoba isyo, batikujoba ubwanalooli, kangi balugu baa Kilisiti.†

⁸ Mujege maaso na bandū abo ukuti Kyala abasaje fijo umwe, imbombo jinu jilingiisa kujja jaa itolo.

⁹ Umundū gwesa ujū ikwinogona ukuti imanyisyo isi ali nasyo nunu ukukinda imanyisyo sya bwanalooli bwa Kilisiti, na ujū atikusikola imanyisyo sya Kilisiti, ujo akaja pamopeene na Kyala. Looli gwesa ujū ikwendelela ukusikola imanyisyo sya

† **1:7 1:7** Abalugu baa Kilisiti Kokuti aba bikupinga imbombo jaa Kilisiti.

bwanalooli, ujo ali pamopeene na Taata Kyala na Mwanaake.

¹⁰ Linga umundu ikwisa kumyinu atikumanyisya imanyisyo isyo isya bwanalooli bwa Kilisiti, mulingammwambililaga pamo ukumpaala mu nyumba syinu.

¹¹ Kukuti mundu uju ikummwambilila ali pamopeene nagwe mu mbiibi isi ikubomba.

Uluponio lwa kumalikisya

¹² Ndi na masyu mingi aga ngulonda ukubasimbila, looli ngiigana ukusimba isyo syosa na bwino mwi ikalatasi. Looli ngusubila ukwisa kumyinu kukubajaatila ukuti twaganile pamaaso. Po aatukwisa kusekela fiijo.

¹³ Abaana abaa ilumbu gwako unsunguligwa bikubaponia.‡

‡ **1:13 1:13** *Abaana abaa ilumbu gwako unsunguligwa bikubaponia* Kokuti abandu abaa nkipanga kya Kyala ikya Johani bikubaponia abandu aba ikubasimbila.

Ulwikano Ulupya
Nyakyusa-Ngonde: Ulwikano Ulupya (New
Testament+)

copyright © 2019 Wycliffe Bible Translators, Inc.

Language: (Nyakyusa-Ngonde)

Contributor: Wycliffe Bible Translators, Inc.

All rights reserved.

2020-11-30

PDF generated using Haiola and XeLaTeX on 18 Apr 2025 from source
files dated 29 Jan 2022

14ff4521-53e4-562c-aacb-6f4faf55a6c8